

Fedoroacha letoi leinjiin

Inara coaaucaun.

¹⁻² Canuna Jesocurisito letono afosoto Fedoro neeun. Inae jauriaalu caje coauneein coaasihalu cana Inaca Cana Coaunerane rijijieein nii niicha ranojoinequichene, Poonto, Galasia, Capadosia, Asia, Bitinia, naonjoainuri batane que cuhin inara atane udaa riaaneein neinequichene raine caa quiricha laenaain letoaaun. Nitohaneein rai cachaneein naitoonjoan tonoraain neeichene cointate, jelai teein rai Suujue que inara suujue teein, Calaohi Jesocurisito coichana aina cuaain inara coulucohin inara raain nelu. Aihane jaun, jeelai amuritoheriin inara coroatajanemiin Cana Coaunera jiniiquiin raotojoein neeichene cointa.

Itolere bana canaacha cohajei ichaonaa

³ Cairichaaajoaain cana coaraain, cana coreniha ohane baiha caje ichanaa Jesocurisitone aina cuaain, nacoaauneein ena nejanoaain nenea rijijieein nenea jaun, cana Curuaanaa Jesocurisito Inaca Cana Coaunera coroaecaachenete ne. Nii Cana Coaunerate itolere bana canaacha cohajei ichaonaanja tereein cana rai.

⁴ Chaen techu aca inara que banihateein dedeeu Cana Coauneraacha rucujuei- nii ichaonaa caohacha inaraacha cohajei tereein. Nii inara rai niicha teeni nii chatohaneein nitajenaa nainerinaain.

⁵ Nitohaneein esinae rauhijiriin inara ichoteraterichaain Cana Coaunerane esenetaain neeichene jaunte, niicha ichana nainei ichaain inara beraicheein, jianacoon neein nii inara ichoteraterichaaine jaan que turuhichene, inara que banihatein niicha rucujuei coitucueratiha inae ecu tihane bana inara quene coina.

⁶ Nitohaneein neriquicheeine jaunte, raotojoein rachoojoein neeiche ena, itolere que coujunojoneein cairichanojoneein neeichene nihatiin.

⁷ Charijieein teeinti usihanau oro teein mocoore caje mituha baasone coina, nii rijijieeinte inara netonai coujunojoneein neriquicheein. Inae nitohaneein coujunojoneein coanojoneequichene jana, itolere necairichanaa abaantaain, inara sarunaa jeriha moconajaerane tonoraelanaala, itolere que laraajiin neeichenete, nii jataain coreti- nitaje rai nena oro amurijiriin nelateinein neriquicheein. Nitohaneein coujunojoneein neeichene abaantaain laraajiin neeichenete, coroaenojoneein neriquicheein inae turuha cana Curuaanaa Jesocurisitone bana.

⁸ Coatiha niqui charijibana Jesocurisito coaraain niheeiche inara. Nete coaraa rijitoein jataain belaaain corojeein rachoojoein neeiche. Chaen techu, “Naaonjoaan,” naain inara ere nejesinaacha que benaa nainiheeiche, jataain necaohachanaa nihane jaun.

⁹ Nitohaneein inae ichoteratenojoneein niha inara suujuene jaunte, raotojoein rachoojoein neeiche. Nitohaneein neeichene cointate Jesocurisito esenetaain neeiche.

10 Nitohaniane coinate inoanlu caje coauneen jianacoon cana ichoteraanu que cuain caohachain coitucuuruhane coina que nerelaain, cairichaojoain cana coaraain ichoteratenojoi nichaachene jaanu terichain cana rai Cana Coaunerane beebejerejetecurelu *profetacuru*.

11 Nitohaneente inae jauriaalu caje coauneen *profetacuru* que coitucueratelu Jesocurisito Suujue, ateinaauruhane baiha nacoauneen ichanaain rai caohacha icharaanu que tiha Cana Coaunerane coitucueratelu. Nii jaunte niqui: “Charijicha nii aicheein. Chatohanai banacha aicheein,” naain niqui coitucunaa jecure, acauru que coitucueratiha Cana Coaunera Suujuene jaun.

12 Nete acauru raineen nenerihani nii Cana Coauneraacha beratenojoi- inara rai caohachaneen neeninu coitucueratelu acauru que Cana Coaunera. Nii jaunte nii ichoteratenojineen neechene jaan, inae inara que coitucuerateure nii Ena Nena Cana Coaunera Ere beracuru dede caje letononeen nena Cana Coaunera Suujue aina cuain. Niite niqui jataain caohatiin coaraain coitucunaa jecurelu Cana Coaunera letono anjerauru netonai.

Esinae rauhijiriin aca jerihane rijijieein ichaonaa coinate cana cotijiaain ne Cana Coaunera.

13 Nitohaniane jaun jatorain niicha que coacuhin coujurihu inara suujua coaraain, nacoauneen turuha uha Jesocuristone jana

inara rai Cana Coauneraacha tenaa jereiicha que jaaequiin neeuche.

14 Coujuriu Cana Coaunera calaohineein nena tocohaneein naitoonjoan tonoraain neeuche. Jiaonriha jauriaalu Cana Coaunera coitucuelanaala inara suujua letono rijijieein ichaohichelune rijijieein ichaohichene.

15 Nitohaneein ichoaelanaala, Cana Coauneraacha que banijiaaainein saantoneein ichaaoche, nii inara cotihara acaihanejei Cana Coauneraacha Saantoneein nihane jaun.

16 Nitohanihane jaunte rai Quiricha inoaensi cuhane: “Acaihanejei inara Coauneraneein Saantoneein nihanune jaun, canu que banijiaainein saantoneein leinjiin canuhacha cachanein ichaaoche,” nae Cana Coaunera.

17 “Cana Inaca Cana Coaunera,” naaiche Cana Coaunera quene jaun, aca chuni ichotelanaala canaacha ichai caje cana ichao coaraain rucuherranein nihane coitucuhin esenetaain ichaohichene coarateein ichaaoche, jaiti cau chauratane que ichaonaa que neein.

18 Inara foerateracuru ichao rijijieein nii chaque nelatelanaala nitaje rai nena ichaonaa que ichaohichene janate, inara ichoteratelu Cana Coaunera. Nii jaunte inara nii nitajerai nena oro, coriqui, naonjoain que coretenohineniha nii inara ichaone raotojoein coitucuhiche.

19 Nitohaneinte caohatiin chaeloon baasoneerilanaala nena carenero narejeen sohin acauru osa coreniha coichana terejetocuruhalu cana inoaensihurune rijijieein, nii chaeloon osaojoejelanaala nena Jesocurisito

sohin, coichana jataain necaohachaain nenea que coretenojoinnein ne nii inara ichao.

²⁰ Inae nitohanein cana coreniha orichaaaine coinete jaiti necoanaeniha cana rai chauratanene ajiniha caje coaunein nesilu Cana Curuaanaa Jesocurisito. Nii jaunte inae ecu tihane jaun jeriha Cana Coaunerane jaun, nii bana inara caohachanu que ecocohin nelu.

²¹ Jesocurisito aina cuaainte, nii oo caje icha-teein rai caohacha icharaanu teranein nenea Cana Coaunera coitucuhin esenetaain neeiche. Nitohanein inara corotajaneranein niha Cana Coaunerane jaunte, leinjiin acaacha cohajein que jaaequiin neeiche.

²² Inae nitohanein Cana Coaunera beratenojoi esenetaain tonoraain neeichene jaunte, inae couluunojoinnein ne inara suujue, jataain inara suujua aina cutaain jiniiquiin Jesocurisito ranojoinnein nenacaauru canejeraauru aina ita belain neeichene coina. Nitohanein le cacha nequichene atiin ita acatiha tacaain, inara suujua aina cutaain ita belain neeuche, nii baaso coacuelanaala.

²³ Enate nacoaaunein nejanoaain nenea rijijiein neeiche. Coatihane cacha onaa inaeranein nenea jaberoco caje nii nejanoaheeiche. Cana Coaunera Ere chabana nitajenaa charanejein satonoelanaala nenea aina cuaainte nii nacoaunein nejanoaaiche.

²⁴ Nitohanihane coinete: “Satiin cachate nejanoaain fojoein ichauhenanein inae biinaanihane ohe.

²⁵ Nete laen Cana Coaunera ere nii charijibana satonoelanaala nereein,” naain laenanohinein

ne Cana Coaunera Quiricha cuhane. Nii inara rai beratenojoneein nena Erenaa esenetaaichene jaunte, inae ichoteratenojoneein neeiche.

2

¹ Inae nitohaneein ichoteratenojoneein neeichene coina, inara rai beratenojoin Erenaa esenetaaichene jaun, jauriaalu baasoneein ichaohin inara amute cacha cairichaa nohanein, necoelajauharitiin, inara amute cacha cotaairiichene nihanatiin belaicha rijitjoein rai ereein neeichene coarateein neeichene jianein neeuche.

² Aiha ena nejanoanaa canaanai ujuari, itaari-icha que coacuhine rijijieein, Cana Coauneraacha jerei que coacuhin, aca jerihane rijijieein ichaohin, inara suujua ilaachete ichoteratenojoneein neeiche.

³ Nitohaneeinte neriquicheein, esinae rauhi-jiriin caohacha teraneein niha Cana Coaunerane coitucuhin esenetaain neeichene.

Ajeri neloheriteeuruhane jaan rijiicha Curisitone que cuaain acaauru relaa Fedorone.

⁴ Nii Cana Coaunera rai ajeri ichaohin nena Jesocurisito, nii chaque nelatihei rijijieein jaolecohin neeuruhalu Isaraelitaacurune jaancha que coacuhin raaicha nelateein neeuche. Nitohaneein nelatihei rijijieein coaracuruhane sainejeeinte, ajeri ichaohin jataain itolere que nelati-neein janijiin Cana Coauneraacha tenojoneein nena ne.

⁵ Nirijieein techu esinae rauhijiriin aca jerihane rijijieein ichaohichene- ajeri ichaohin nena caje Cana Coaunera lorerineein ichanohin

Teenforo rijijieein rai saseredote esine neein Cana Coauneraacha jerei ichajeein saantoneein neriquicheein. Nete inoaenlu aichejetocuruha saseredotecurune rijijieein, carenerocuru sohin coichana teraneein nenereieicheein. Inarate Jesocurisito aina cuaain Cana Coauneraacha jereineein, rai cachaauru suujuateraneein neriquicheein.

⁶ Nitohanerichaaaine quete:

“Sioon neseeune, ajeri jataain

nelateinneein nena quiicha janijii teeun.

Aihana jaun esinae rauhijiriin

caohachaniha nii ajeri quiicha teeine coitucuhin

esenetaain nena que

chabana jaolecorinaauni,”

naain laenanohineein ne Cana Coaunera Quiricha cuhane.

⁷ Cana, esenetaera nichaachene rai nii Cana Coauneraacha tei ajerite jataain nelateineein ne. Nete Cana Coaunera Quiricha cuhane laen nii esenetaelanaala nenacaauru que:

“Jaolecooruha loreri icharaaurune jaan ajerite,

loreri nunuheneein temuraneein nerotoha cureein.

⁸ Acate leinjiin ajeri jaberoconeein

lacurocuruhane jaaneein nereein,”

naain laenanohi nihane rijijieeinte, inae lacurocure, nitohaneeuruhane coina inae ichanohineein neeuruhane jaun.

⁹ Nete inara le lauriineeichene, Cana Curuaanaa rai saseredoteneein niicha janijiineein, Cana Coauneraacha jereineein rai cachaneein neeiche. Nitohaneeinte inara raain nelu Cana

Coaunera, jataain rai caohachaneein nenea ni-icha beratei beeiche leeochoauru raine coina. Acate nocohenaanau nenea rijijieein neeichene jana, inara cotijiaain nelu, rai caohachaneein nenea Cojoanonaa que neeichene coina.

¹⁰ Jauriaalu niqui cairichaojoaain inara coaraain niheilu Cana Coaunera, rai cachaneein neneeichene jaun. Nete inae enene rai cachaneein neeichene jaun, inae cairichaojoaain inara coarae Cana Coaunera.

Cana Coauneraacha icharatei ichajeein ichaaoche

¹¹ Canejeraauru, atiin inara suujua coaraain, inae nejelau cachanequichene ichao que ichaaoche, nabana nitajiha inara suujuene coataa.

¹² Cana Coaunera coitucuelanaala nenacaauru aina neeichene nihanatiin, coujurihu Cana Coaunera coitucueraneein neeichene coaraatein neeuche. Nitohaneein ichaohichenete, baaso ichara niha inara beeuruhane nihanatiin caohacha ichaquichene coaraain Cana Coaunera coroaecurureein, inae le cachaniquichene caje inaraacha ichanohi rucuhecane cojoanonaa que turuhane bana.

¹³ Inae Cana Coaunera cachaneein neeichene jaun, satiin inara amute cachaauru-cocainanacainein nenacaauru ere tonoraain neeuche. Chaen leeochoauru cocainanacaihuru amuritoheriin cocainanacainein nenea enferadoro ere tonoraain neeuche.

¹⁴ Nii rijijieeinchu nii rai letonocuru- baaso icharaauru casetecaain caohacha ichaeraauru coroaeraneein nenacaauru ere tonoraain neeuche.

15 Nitohaneein neeichenete jere Cana Coaunera, nabana tonaain ereeuruha inara que caohacha ichaera cacha nocoeje chanuheriin ichaonacaauru aina cha coitucuhichuru cachaaurune coataa.

16 Inaraacha jerei ichana nainequiche niqui. Nete laen nii inaraacha ichai aina cuaain naine-neeiche leeochoauru rai baaso ichaquichene. Aihana jaun coujuriu Cana Coaunera cachanein caohacha ichaain neeuche.

17 Satiin que inara suujua acateein jiniiquiin ita belaaain- jeriha Cana Coaunerane rijijieein neeinenferadoro que inara suujua acateein neeuche.

Cana relaeranu que necairichaain nihalu Curisitone

18 Nitohanihane jaun rai fatoroon ere tonoraain aca jerihane rijijieein neeine letononeein nena. Jiaonriha caohachaain belaaain aca jerihane rijijieein siriha fatoroone jauhancha nere tonoraain nihane. Nechu aansainein cotaitiin niha fatoroone nihanatiin nere tonoraain neeine.

19 Jeriha Cana Coaunerane rijijieein ichaohacachene coreniha, lera colane rai cacha nihacachene corenihacha cana casetecaain cana cairichaane nihanatiin, jianelanaala abaantaacachenete jataain caohate.

20 Jana esinae rauhijiriin baaso ichaquichene coreniha inara casetecaain neeuruhane abaantaain neeichene, coatiha caohacha ichaa airiheicheein. Nete laen caohacha ichaquichene coreniha, inara casetecaain inara cairichaeranihane, soroelanaala abaantaachene Cana Coaunera notaracae caohacha ichaa airiquicheein.

²¹ Nitohaneein neeichene coinete, inara cotijiaain nelu Cana Coanera. Inara coreniha necairichanaa abaantaain nihalu Curisito inara que coarateeine rijijieein, inara netonai necairichanaa abaantaain neeuche.

²² Coatiha niqui aansijieeiniji osa que nesaruhin nihei chuni coritaain niheilü Curisito.

²³ Niheichu nocoejechanuuruhane nihanatiin coatiha acauru nocoejechanuhin nerejetohilu. Niheichu cairichauruhane nihanatiin tonaain ereein nerejetohilu. Cana Coanera esinae rauhi-jiriin baaso icharaauru coitucuhin nii rucuhene coinaachate aitoraaetelu.

²⁴ Nii Curisitote jaberoco aina cuaain cana osa amaain coroso que ohin aina jiniiquiin cana osa atinaelu, aina cuaain ichaonaa esine que ichao-hin osa colane nena coina. Nitohaneeinte cana osaacha que nesarujueein nihacachene caje cana mitaeranu que coroso que ohelu Curisito.

²⁵ Jaurihaalute niqui aiha beraicha colane nena carenerone rijijieein nitajenaa neein nerejetocooachelu. Nete laen inae ena carenerocuru beraiha beraichane, nitajenaa nainecurenihane rijijieein inara beraain niha Curisitone jaun, nitajenaa naineneeichene jaan ichaonaa que ichao-hiche.

3

Naaonjoaai ichaauruhine sinijeraaonacaauru.

¹ Aihana jaun inara lanauru ere tonoraain neeuche enecuru. Aihute inara ichao cajeecha coaraain, acauru rai erenaa latelanaala, nii Cana Coanera beratenojoin erenaa coitucuhin

esenetaain neeuruhine esenetana jerelanaala nena
nacaauru inara lanaauru,

² esinae rauhijiriin caohachaain neein, nii
baaso ichaelanaala inara suujua acateein
ichaohichene coaracuruhane.

³ Esinae rauhijiriin caohachaain nena
jeriquichene, nii nitajenaa inaurera rucuhele
oro caje ichanohichuru, cajione caohachaauru,
naaonjoainuri que coacuelanaala,

⁴ inara suujua aina cutaain esinae rauhijiriin
Jesocurisito suujue que coacuhin neeuchete rao-
tojoein neeiche. Caohachaain Cana Coaunera
notaracaae nihacanete jataain nelate.

⁵ Nii rijijieein techu nerejetocure cana
inoaensihuru benecuru- jeriha Cana Coaunerane
rijijieein ichaonacaauru. Nitohaneein jeriha
Cana Coaunerane esenetaauruhane jaunte,
jeriha acaauru lanaaurune rijijieein acaauru
ere tonoraain neurelu nii acaauru benecuru.

⁶ Nitohanihane jaun techu: “Canu curuaanaa,”
narejete lana Abaraaun rai Sara, nere tonoraain
aca jerihane rijijieein nihane jaun. Nii aihalu
Sarane rijijieein casilanaala coejelanaala neeich-
enete, rauhijiriin coujuriu nii Abaraaun aina Sara
nefoerateneein nena rijijieein neriquicheein.

⁷ Jana inara acaauru lananequichene,
jeriha inara sinijeraaurune rijijieein jiniiquiin
ita suujua rijijieein neeuche. Coa ene
neeuruhane amihaneeon amurijiriin, inara
sinijeraauruhacha ichanenu teein nihache. Inara
rijijieein acaauru caohachane quete, nitohaneein
acaauru rai ichaonaa teein nelu Cana Coaunera.
Aineeichenete Cana Coaunera bajaain neeichene,

inara ere tonoraenereein Cana Coaunera.

Satiin Cana Coaunera ranojoneein nenacaauruhacha ichanenu

⁸ Aihana jaun ita suujua rijjijeein neein ita janojera rijjijeein ita belaaïn, leeochoaauru coroatajaneein, nii leeochoaauru amurijiriin nenea coacuelanaala neeuche.

⁹ Jiaonriha tonaain baasoneein inara que ereein neinihane, nii tonaain que baasoneein ereeichene. Niheichu inara nocoeje chanuheranihane, coa inara netonai nocoeje chanuhache. Nitohanenaa coacuelanaala acaauru rai caohacha ichacuche. Nitohaneein inara rai caohacha ichaane coina inara raain nihalu Cana Coaunerane rijjijeein.

¹⁰ Nii coinate:

“Chunocoha nichao colalajiin
raoti ichaonaa que ichaonaa jerihane,
namute cacha que baasoneein erelanaala,
nii casajenelanaala,

¹¹ baasoneein ichaonacaauru aina nelanaala,
caohachaacha ichaain
raotojoein ichaohane jaanuhacha ariin
acaacha sacuhine.

¹² Cana Coaunerate
caohachaain suujua coaraain ichaonacaauru be-
raichaneein nihane jaun,
bajaauruhane aonaain ne.

Nete laen baaso ichajeein ichaonacaauru que
jaoleconaa rijjijeein ne,”
naa Cana Coaunera Quiricha inoaensi cuhane.

¹³ Nitohaneein itolere bana caohacha
nejesimaacha que coacuhin neeichene, nerihei
inara rai baaso ichara.

14 Nete laen caohacha ichaquichene coreniha necairichanaa coaraquichene nihanatiin rachoojoein nerausiajejein neriquicheein. Jiaonriha nii chuni que casiin nesooneein neeichene.

15 Nesoonenaa coacuelanaala raujiaaincha inara suujua cuhane Cana Curuaanaa Jesocurisito coacuhin bajaebajaecuche. Chaen letona jatoroain neeuche chunocoha inara caje, “Chatohanihana nii jaecoichene jaan,” naain bajaa inara cajene, raotojoein belain beeuchete coitucuhin neeine.

16 Nete acaauru amurijiriin nena coacuelanaala, acaauru que inara suujua acateein acaauru rai beeichene caohachae. Nitohaneein coujuriu Jesocurisito esenetaeraneein caohacha nejesina ichaain neeuchete nocoejecurumiin inara que baasoneein erenacaauru.

17 Baaso ichacaachene coreniha necairichanaa coaracaachene amuritoeriinteja nena caeneein caohachae caohacha ichacaachene coreniha necairichanaa coaracaachene, nitohaneei jeriha Cana Coaunerane jaun.

18 Nii rijieein techu Jesocurisito netonai lesajeeincha cana osa coreniha cairichanojoneein ohin nelu. Coatiha niqui nii chatohanai baaso ichaain osa que nesaruhin niheilula aca, nete erenaa tonoraelanaala baasoneein ichaonacaauru coreniha necairichaa in nelu, rai Inaca Cana Coaunera rene cana amaane caina. Joaenreein cacha rijijieeinte niqui ohin nelu rai jaberoco. Nete aca Cana Coaunera suujuenihane jaun oo caje ichanaain enanetojoein ichaohin ne.

19-20 Nitohaneente suujue nejesinaneein

cuhin, acau tabai itajenojoneein moconajaera casetecanohineein nitajenacaauru suujue relaelu. Acaaurute bote nainaa Nohene reentiaain esenetaauruhane cohaca Cana Coaunerane sainejeein, esenetaaurenihane jaun nitajeeurelu. Acaauru tabaauru esenetaeraauruhachate, itolereneein fosanejeein acau tabai caje nichoteeurelu.

²¹⁻²² Nii acaute cana osa jianein ichao-hacachene coina baotisanojoinichaane jaa cojunacaneein nenaanelu. Nii aina cuaainte, inae ichoteratenojoneein nihacache cana netonai. Coatiha raujiaain culuonjoiniha cana jaberocoine coina baotisanojoi nihaacache. Acate raujiaain cana jaberoco coulocohin, oo caje ichanaai dedeeu cuhin Cana Coaunera raotono nichajai que neein, itolere anjeraauru amurijiriin, cocainanacaihuru amurijiriin nihane coina nena Jesocurisito aina cuaain, aina nena coina cana suujue coulooca Cana Coaunerane jaan neein ne.

4

Cana Coaunera tenojoi inaraacha ichana nainei que leeochoauru coroatajanecuche.

¹ Aihane jaun cana coreniha jaberoco cairichaaain nihalu Curisitone rijijieein, inara netonai necairichanaa coaraquichene coina jatoraain neeuche.

² Suujua letono rijijieein ichaohane jianein Cana Coaunera jerenohicha ichaane coreniha necairichanaa coaraain neite osa caje nichotereein.

³ Jauriaalute inara netonai aihuruha nii Cana Coaunera coitucuelanaala nenacaaurune rijijieein nerejetocoichelu. Nitohaneeichene jaunte, jataain baasoneein ichaohin, inara suujua coaraelanaala necha ansaineein nerejetocoichelu, jianelanaala cocohin, tonijiaain ichaain ajenacaauru aina niha natiin neein, nii ichanohichuru ecaantooruniha natiin corojeein, naaonjoaain nerejetocoichelu.

⁴ Nete laen inae enene, chabana jianelanaala baaso ichaain nenacaauru aina ichaorejetocoichene jianequichene jaun, inae inara coaracureniha acaauru aina nejaun inara cojoelatiin inae baasoneein inara que ereeure.

⁵ Nete inae ecu tihane bana onacaauru, ichaohin nenacaauru, naaonjoainuriicha ichai coitucuhin nii rucuheraanu que nena cojoanonaa que tihane bana, raajenhane niicha ichai biha cuurureein.

⁶ Nii onacaauru raite Cana Coaunera ere berejetecurelu, ohin neeuruhane nihanatiin aitoaha Cana Coaunerane rijijieein suujue nejesinaneein ichaohin neeuruhane coina. Jerichanejeein techu niqiu, aitocuruha cachaaaurune rijijieein caohacharelu jaiti jaberoconeein neeuruhane bana rucuhenhinihalu niine.

⁷ Inae satonoha itolerene que tururichaje. Aihane jaun inara que Cana Coaunera icharatenohin ichajeein Cana Coaunera bajaee bajajeein ichaaoche.

⁸ Itolereneein inara suujua aina cutaain jiniquiin ita belaaain ichaaoche. Jataain ita belaaain ichaoha cachanete arajii rai nosa que suujua acatereein Cana Coaunera.

⁹ Inara rene turuhin niha chunine tonaain leeochoaauru que erenaa coacuelanaala inara loreri asaee raauche.

¹⁰ Coujuriu lauri lauri inara que Cana Coauneraacha icharatenohi icharaneein nena tocuhanein, ichana naineguichene rijijieein inara rai Cana Coauneraacha tenojoi aina cuaain leeochoaauru coroatajanecuche.

¹¹ Chunocoha tonaain erenaa jerihane jaa que irihane, jeriha Cana Coaunerane rijijieein ereein neeine. Chunocoha coroatajanera latihane, ii rai Cana Coauneraacha tei que laraajiin coroatajaneeu. Itolere iicha ichai ichaaine, itolere bana caohachaaain ichaute ii coroatajanilha Cana Coaunera aina Jesocurisitone coaraain coroaecuruhine cachaauru. Acate rai necaohacha que necaohachaaain itolere ichana naineraneein nechariji bana satonoelanaala. Nitohanemiin.

Coujuriu Jesocurisito ranojoneein nena tocuhanein necairichanaa abaantaache.

¹² Canejeraauru, jiaonriha mainajeein coujunojoneein neriquicheeine que jatoroaelanaala neeichene.

¹³ Raujiaaincha aihalu Curisitone rijijieein necairichanaa coaraain neeichene nihanatiin rachoojoein neeuchee inae turuha necaohachane bana rachoojoein neriquicheeine jaun.

¹⁴ Curisito cachanein neeichene coreniha inara batohin nei nihanete, nerausiaaequiche jataain caohachaaain nena Cana Coaunera Suujue inara aina nihane jaun.

¹⁵ Nitohanihane jaun necoejemiin, sonajaain jaohin, asijiaotoneein, leeochoaauru rai cotainacai

ichaain, naaonjoain ichaane coreniha cairichano-
joineein nena.

¹⁶ Jana Jesocurisito cachaneein neeichene
coreniha inara casetecaain neinihane, jiaonriha
nocojequichene. Raujiaaincha coreniha Cana
Coaunera bajaain corojeein neeuche.

¹⁷ Inae cana rai cachanichaachene ichanohi
rucuheca Cana Coaunerane cojoanonaa que tu-
ruha. Nitohaneein rai cachanichaachene que
nunuhetein, nitohaneein icharichaainne jaun,
chatohaneeururichaaain Cana Coaunera ere tono-
raelanaala nenacaauru.

¹⁸ Coaracuche nachuhinti rai cacha
nichaachene saijieein, necairichanaa
coaraain nichoterichaacheeine. Nii jaun
chatohaneeururichaaain chaainti, nechu
aansaneein osaaonacaauru.

¹⁹ Nitohanihane jaun, Cana Coauneraacha jerei
ichaquichene coreniha necairichanaa coaraain
neeichene nihanatiin, itolere bana caohacha icha-
jeein ichaohin, naitoonjoa rijijieein cha ichaer-
aneein nena Cana Coaunera bijiu inara suujue
teeuche.

5

*Jesocurisito ranojoineein nenacaauru suujuat-
era*

¹ Enane laen nii inara aina ita taojieraauru
bichauhenaauru suujuatena jereen. Canuhet-
onaine acaauru rijijieein ichauhenaneein cana
coreniha necairichaalu Jesocurisitone beraneein
neen. Nii rijijieeinechu canuhetonai acaauru
aina jiniiquiin Cana Coaunera Cojoanonaa que
nereunni, inae ecu tihane bana.

² Nii inara que Cana Coauneraacha beraichatenojoi, rai cachaneein nenacaauru beraihuiche. Nii coinata inara que beraichatena-jae Cana Coaunera. Caohachaaain inara suujua coaraain jeriha Cana Coaunerane rijijieein acaauru beraihuiche. Jiaonriha inara letoaera lateein core coinaacha ichaquichene. Raujiaain jeriha Cana Coaunerane rijijieein corajeein ichacuiche.

³ Acaauru curuaanaaneein nena coacuelanaala, raujiaain caohacha nejesina ichaaain neeichene coarateeuche acaauru quete, acaauru netonai inara caje nerelaaurumii.

⁴ Nitohaneein neeichenete, inae turuha cana beraicha esineneei nenaane bana, inara que rai necaohacha que necaohachaaain nena- comai lauriareein inara couturi que. Nii comai chariji bana setuhin naasaerinaain.

⁵ Jana inara enamanaacuru, jerecuruha inara bichauhenaaurune rijijieein neeuche. Satiin ita suujua rijitjoeein ita amurijiriin nena coacuelanaala nii:

“Cana Coaunerate,
itolere amurijiriin nena jereraauru
lacuroaeranein,
cairichanojoein nenacaauru cairichaaajoaain
coaraain
coroatajaneranein ne,”
naain niha erenaane que ninae.

⁶ Aihane jaun Cana Coaunera bijihu neein, nii chaque nelatihei rijijieein neeuche. Acate inae ecu tihane bana jataain nelateineein neeichene coina ichareein.

⁷ Coa itolereecha que coacuhin nererojoeccaeriin nihache, itolereecha que inara berairichaaïn Cana Coaunerane jaun.

⁸ Aihana jaun caohachaaïn jataaïn itolere que nainaaïn neeuche. Charijieein teeinti jatoraaïn quihane rai netiïn nesari ariirijie janolari, nii rijijieeinte jatoraaïn inara ariirijie moconajaera inara itajihane coina.

⁹ Charijieeinijin chatohanai que inara sarunaa jereranihane, jiaonriha rijitoecheene. Rauji-aaincha nii inaraacha esenetai aina cuaaïn laraa-jiin, satiïn chauratane sacuritaain nenacaauru cana nejeraauru netonai, nii jelai necairichanaa abaantaain neeuruhane coitucuhin abaantaain neeuche.

¹⁰ Nete inae carajaojoaain necairichanaa abaantaain neeichene baiha, inara coroatajaniha Cana Coaunerane aina rauhijiriin baaso ichana coacuelanaala laraajiin acaacha esenetaain neriquicheein. Nii jeelai Cana Coaunerate, jataaïn cana belaitohane jaun, rai calaohi Jesocurisito aina cuaaïn cana cotijiaain cana raain nelu, rai Cojoanonaa que aina nena coina.

¹¹ Nitohaneein itolere ichana naineraneein neeine chaabana satonoelanaala. Nitohanemiin.

Satono tihane rai nocoïha Fedorone.

¹² Casuujua rijijieein nena cana nejera Siribano quene caa quiricha laenaerateeun inara rai-chaque tonaelanaala inara suujuatiha. Chaen jataaïn esinae rauhijiriin inara belaiha Cana Coaunerane jaun, coujunacaniha rausiaenojoeinein neeichene jaanu tihane coitucuhichene coina. Aihane jaun jataaïn inara

belaiha Cana Coaunerane jaun, aca jerihane rijijieein ichaaoche itolere bana.

¹³ Janijiin inara raain nihalune rijijieein, Babiloniau janijiin Cana Coaunera ranojoneein nenaaurute inara coacue. Cacalabi rijijieein nena- Maroco netonaite inara coacuhe.

¹⁴ Ita rene turuhin neeichene, raotojoein jiniquiin ita belaa in ita raain neeuche. Satiin Jesocurisito cachaneein neiniquichene raotojoein neeuche.

Cana Coaunera Ere
New Testament in Urarina (PE:ura:Urarina)

copyright © 2008 Wycliffe Bible Translators, Inc.

Language: Urarina

Translation by: Wycliffe Bible Translators, Inc.

Urarina [ura], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Urarina

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
b7ea44d4-3dbd-507b-9a19-256b56fe9b07